

An aerial photograph of a blue and white ship sailing on a calm body of water. The ship is moving from left to right, leaving a white wake. In the background, a large, rugged island with steep cliffs and sparse vegetation is visible. The water is very still, reflecting the sky and the island. A dark blue banner with white text is overlaid on the right side of the image.

Árs- og sjálfbærniskýrsla Eskju 2021

1. Ávarp stjórnarformanns

Gjöfult ár að baki

Gjöfult ár er að baki hjá okkur í Eskju. Árið 2021 var afar farsælt hjá félaginu og mikil verðmæti sköpuð í samfélaginu, bæði nær og fjær. Að baki þessari verðmætasköpun liggur mikið vinnuframlag, miklar fjárfestingar, gott skipulag og góð samvinna, bæði meðal starfsmanna og okkar helstu samstarfsfyrirtækja sem við erum þakklát fyrir.

Hjá Eskju hefur byggst upp mikil þekking hjá starfsfólki, verktökum, verkfræðingum og öðrum þjónustuaðilum sem stíga ölduna með okkur. Í samfélagi eins og okkar er hver einstaklingur mikilvægur.

Við sem störfum við sjávarútveg og þá sérstaklega í uppsjávarveiðum og vinnslu stöndum frammi fyrir mikilli óvissu og sveiflum í rekstrarumhverfinu en verkefni okkar er að grípa tækifærin þegar þau gefast. Það leynast líka áskoranir og mikilvægt er að sofna ekki á verðinum, heldur vera sífellt á tánum til að bæta okkur og aðlagast breytingum.

Eskja sérhæfir sig í veiðum, vinnslu og sölu á uppsjávartegundum en slík matvælaframleiðsla er ein sú umhverfisvænasta sem fyrirfinnst. Hún er með lágt kolefnisfótspor og hefur nánast engin áhrif á lífríkið ef veiðarnar eru stundaðar á sjálfbæran og ábyrgan hátt. Það er því áhyggjuefni að okkar helstu uppsjávarstofnar í Norður – Atlantshafi sem við deilum með öðrum þjóðum eru veiddir án samkomulags og umfram vísindalega ráðgjöf.

Það á ekki við um loðnustofninn en þeim veiðum er stjórnað gætilega af íslenskum stjórnvöldum byggt á ráðgjöf Hafrannsóknarstofnunar. Á liðnu ári stóð það upp úr að loðnustofninn hefur loks komið til baka. Á árinu hófum við aftur loðnuveiðar og vinnslu eftir tvö loðnulaus ár sem var kærkomið, auk þess sem félagið keypti loðnu til vinnslu af norskum skipum.

Fjárfesting Eskju í nýjum frystiklefa, sem var tekin í notkun í upphafi árs, gegndi lykilhlutverki fyrir okkur við að hámarka verðmæti loðnuvertíðarinnar. Það sýndi okkur einnig hversu mikilvæg fjárfesting í innviðum eru til að geta nýtt tækifærin sem bjóðast.

Eskja gefur nú út árs- og samfélagsskýrslu í annað sinn. Í þeirri vinnu höfum við mikið lært og fengið hugmyndir og innblástur til góðra verka í okkar samfélagi og nærumhverfi. Út frá vinnunni vaknaði hugmynd að fjárfesta í kolefnisjöfnun og ákvað stjórn Eskju að fara í samstarf við Skógræktina og vera fyrsta sjávarútvegsfyrirtækið á Íslandi sem bindur kolefni með gróðursetningarverkefni á Héraði. Verkefnið er umfangsmikið og við erum að stíga okkar fyrstu skref. Plönturnar munu á næstu áratugum binda sem jafngildir eins árs losun hjá fyrirtæki eins og Eskju. Ljóst er að verkefnið er aðeins lítið skref í átt að kolefnishlutleysi en það viðfangsefni er stórt og tækifærin til úrbóta mikil.

Eskja er sem áður fyrr stoltur aðili að samfélagsstefnu Samtaka fyrirtækja í sjávarútvegi en einkunnarorð stefnunnar eru „Ábyrgur sjávarútvegur í sátt við umhverfi og samfélag“. Einnig er félagið aðili að Festu – miðstöð um sjálfbærni.

Eskja mun halda áfram á sömu braut á þessu ári og verið hefur og stunda ábyrgan rekstur til lands og sjávar. Eskja er stolt af þeim verkefnum sem félagið hefur tekið að sér fyrir samfélagið. Þar mun engin breyting verða á.



Erna Þorsteinsdóttir

EFNISYFIRLIT

1. Ávarp stjórnarformanns	2
2. Um skýrsluna	4
3. Um Eskju	6
4. Eskja og sjálfbærni	16
5. Umhverfispættir	18
6. Félagslegir þættir	23
7. Stjórnarhættir	27
8. Viðauki	33

Ritstjórn: Páll Snorrason, Sigrún Ísaksdóttir
Ljósmyndir: Gungör Tamzok





2. Um skýrsluna

Eskja gefur nú út í annað sinn árs- og sjálfbærniskýrslu og er það til marks um skuldbindingu félagsins við sjálfbærni og loftslagsmál. Skýrslan horfir til helstu þátta sjálfbærni og er byggð upp í samræmi við viðmið Nasdaq um umhverfi, félagslega þætti og stjórnarhætti (UFS viðmið) og fylgir Global Reporting Initiative (GRI) staðlinum, ásamt því að tengja reksturinn við Heimsmarkmið Sameinuðu þjóðanna.

Eskja hefur skrifað undir samfélagsstefnu SFS og er þessari skýrslu ætlað að gefa greinargott yfirlit yfir starfsemi Eskju og frammistöðu félagsins út frá helstu umhverfis- og félagslegum þáttum og stjórnarháttum. Með þessari skýrslugjöf vill Eskja sýna ábyrgð í samfélaginu og út frá umhverfisáhrifum sínum, bæði beint frá starfseminni og í gegnum virðiskeðjuna. Félagið vill hafa jákvæð áhrif á samfélagið og stuðla að góðum vinnustað þar sem allir fá jafnt tækifæri til að vaxa og dafna.

Upplýsingar í skýrslunni ná til Eskju og dótturfélaga: Eskja Sales & Export ehf., Eskja-Vöruhús ehf. og Eiður Ólafsson ehf.

Skýrslan nær yfir árið 2021 og eru allar tölur og mælikvarðar í skýrslunni settar fram samkvæmt bestu vitund.

2. Um skýrsluna

Helstu sjálfbærniliðir 2021 í samanburði við 2020

Heildar kolefnisspor
33.390 tCO₂i
Aukning um 21%


Orkunotkun
38.812k KWH
Óbreytt

Eldsneytisnotkun
10 milljónir lítra
36% aukning


Flokkun úrgangs
82%
Óbreytt

Kynjahlutföll
1% fjölgun kvk

Olíunotkun skipa á veitt tonn eftir tegundum



Losun gróðurhúsalofttegunda (GHL) á veitt tonn eftir tegundum



3. Um Eskju

Sagan

Hver erum við

Eskja er sjávarútvegsfyrirtæki á Eskifirði sem hefur verið leiðandi afl í íslenskum sjávarútvegi síðustu 75 árin. Fyrirtækið hét áður Hraðfrystihús Eskifjarðar og var stofnað 8. maí 1944 í því skyni að skjóta styrkum stoðum undir fábreytilegt atvinnulíf bæjarins. Félagið hefur vaxið og dafnað í áranna rás. Starfsfólk fyrirtækisins er að meðaltali um 100 en sveiflast nokkuð innan ársins samhlíða vertíðarálagi.

Eskja er eitt af stærstu sjávarútvegsfyrirtækjum landsins og starfrækir tvö skip, fiskmjölsverksmiðju og fullkomna uppsjávarfrystingu á Eskifirði. Uppsjávarfrystihús Eskju er 7.000 m² að stærð og býr yfir vinnslugetu upp á 900 tonn á sólarhring. Þá er vinnslugeta fiskimjölsverksmiðjunnar um 1.000 tonn á sólarhring. Starfsemin er knúin með íslensku rafmagni sem framleitt er úr 100% endurnýjanlegum orkugjöfum.

Samstæða Eskju samanstendur af móðurfélaginu Eskja hf. og dótturfélögum þess Eskja Sales & Export ehf. sem er sölufélag Eskju og Eskja-Vöruhús ehf. sem á og rekur frystiklefa. Árið 2021 keypti Eskja félagið Eið Ólafsson ehf. sem gerir út netabátinn Ísak AK 67.

Eskja hefur frá fyrstu tíð haft það að leiðarljósi að umgangast fiskimiðin umhverfis Ísland af ábyrgð og virðingu, í samræmi við lög og reglur og að lágmarka umhverfisáhrif starfseminnar.

Eskja leggur áherslu á sjálfbæra nýtingu auðlindarinnar og hefur það að markmiði að nota ávallt nýjustu framleiðslutækni sem völ er á við starfsemina. Eskja hefur einsett sér að vera í fremstu röð í allri starfsemi, vinna að stöðugum umbótum og að starfa ávallt í sátt við umhverfi og samfélag. Þá leggjum við einnig ríka áherslu á fræðslu og endurmenntun starfsfólks okkar.



3. Um Eskju



Rekstur, skattar og opinber gjöld 2021

Rekstur Eskju gekk mjög vel á árinu 2021 og var það besta rekstrarár í sögu félagsins. Loðnuveiðar hófust að nýju á árinu og þó vertíðin 2020/2021 hafi verið lítil voru verðmæti afurða mikil. Í lok árs var gefin út einn stærsti loðnukvóti í áratugi fyrir vertíðina 2021/2022 og hófust veiðar í desember 2021. Ýmsir þættir hafa áhrif á rekstur félagsins eins og gengisvísitala krónu, verðlag innanlands og erlendis, magn og verðmæti veiðiheimilda, fiskverð á mörkuðum, launakostnaður, verð olíu til rekstrar véla og skipa og önnur aðföng og síðast en ekki síst vaxtastig erlendis og innanlands.

Rekstrarumhverfi félagsins er síbreytilegt og ræðst ekki síst af sveiflum og óvissu í stærðum nytjastofna. Sveiflur eru mun meiri þegar kemur að uppsjávarstofnum og undanfarin ár hafa strandríkin í Norður – Atlantshafi ekki náð samkomulagi um skiptingu á okkar helstu deilistofnum sem er áhyggjuefni. Á árinu 2021 námu tekjur Eskju 13,1 milljörðum króna samanborið við 8,7 milljarða króna árið 2020.

Verðmætasköpun félagsins hefur viðtæk samfélags- og efnahagsleg áhrif á Íslandi sem meðal annars má sjá með skattaslóð Eskju. Skattaslóðin inniheldur alla helstu skatta og opinber gjöld sem samstæðan greiðir eða innheimtir á Íslandi, ásamt mótfamlagi í almenna lífeyrissjóði starfsfólks.

Í skattaslóð Eskju er varpað ljósi á umfang þeirra verðmæta sem rekstur Eskju skilar til samfélagsins í formi lögbundinna gjalda. Eskja skilar ýmsum öðrum verðmætum til samfélagsins og leggur áherslu á að styðja uppbyggileg samfélagsverkefni með því að veita styrki og leggja af mörkum til góðgerðar- og mannúðarsamtaka.

Eskja greiddi 1.582 milljónir kr. í skatta og gjöld og innheimti 829 milljónir króna á árinu 2021 af starfsfólki fyrir ríkissjóð. Samtals var því skattaslóð starfseminnar 2.411 milljónir króna eins og nánar er vikið að á næstu síðu.

Rekstraruppgjör				
	2021 (USD m)	2021* (ISK ma)	2020 (USD m)	2020* (ISK ma)
Rekstrartekjur	99,2	12,6	60,7	8,2
Aðrar tekjur	4,2	0,5	3,9	0,5
Rekstrargjöld	57,8	7,3	40,5	5,4
EBITDA	45,6	5,8	24,1	3,3
Afskriftir	6,8	0,9	6,0	0,8
Fjármagnsliðir og hlutdeildarfélag	0,7	0,1	-4,9	-0,7
Hagnaður fyrir skatt	39,5	5,0	13,2	1,8
Tekjuskattur	7,8	1,0	2,7	0,4
Hagnaður eftir skatt	31,7	4,0	10,5	1,4
Laun og launatengd gjöld	19,4	2,5	12,8	1,7
Arðgreiðslur	8,0	1,0	4,0	0,5

*Rekstartölur umreiknaðar í íslenskar krónur á meðalgengi árs.

3. Um Eskju

Skattar og opinber gjöld 2021

Skattaslóð (ISK m)

Greiddir skattar og gjöld

Tekjuskattur	800,2
Veiðigjöld	126,2
Mótframlag í lífeyrissjóði	227,2
Tryggingagjald	150,9

Aðrir skattar og gjöld

Fasteignagjöld	50,4
Gjöld í stéttarfélög	34,1
Kolefnisgjald	78,9
Bifreiðagjald	0,4

Gjöld til hafnarsjóða

Aflagjöld o.fl.	102,4
Vörugjöld	11

Alls greiddir skattar og gjöld 1.581,7

Innheimtir skattar

Staðgreiðsla starfsmanna	695,8
Lífeyrissjóðsiðgjöld starfsmanna	133

Alls innheimtir skattar 828,8


Skattaslóð alls 2.410,5




3. Um Eskju

Verðmætasköpun til samfélagsins

Fjárhagsleg verðmæti (ma.kr.) 2021




Skattaslóð Eskju (ma.kr.) 2021



3. Um Eskju

Viðskiptalíkan Eskju: „Business Model Canvas“



3. Um Eskju



Fiskveiðar og útgerð

Eskja sérhæfir sig í veiðum og vinnslu á uppsjávarfiski með sjálfbærum hætti. Félagið framleiðir frystar afurðir til manneldis úr uppsjávartegundum eins og makríl, síld og loðnu, vinnur loðnuhrogn auk þess að framleiða mjöl og lýsi úr kolmunna og afskurði sem fellur til við vinnsluna. Eskja gerir út tvö uppsjávarveiðiskip, Aðalstein Jónsson SU-11 og Jón Kjartansson SU-111.

Á árinu 2021 veiddu uppsjávarskipin tvö samtals 79.822 tonn þar af fór þriðjungur af aflanum til manneldis og annað í mjöl- og lýsisvinnslu.

Aðalsteinn Jónsson SU-11 Uppsjávarskip smíðað 2004 og keypt til Eskju 2016



Verðmæti afla
1.855 m.kr.



Heildarafli
40.226 tonn

Jón Kjartansson SU-111 Uppsjávarskip smíðað 2003 og keypt til Eskju 2017



Verðmæti afla
1.804 m.kr.



Heildarafli
39.596 tonn

3. Um Eskju

Áhersla á veiðar og vinnslu á uppsjávarfiski*

Samanburður fiskitegunda												
Tegund	 Kolmunni			 Loðna			 Makríll			 Síld		
Aflahlutdeild	19,2%			8,8%			9,9%			8,6%		
Lýsing	Kolmunni er nýttur í fiskimjöl.			Loðnan er fryst og hún einnig nýtt til framleiðslu á hrognum.			Makríll er frystur, hausaskorinn og flakaður. Afskurður er nýttur í fiskimjöl og lýsi.			Síldin er fryst og flökuð. Afskurður er nýttur í fiskimjöl og lýsi.		
Veiðitímabil	jan.	feb.	mar.	apr.	maí	jún.	júl.	ágú.	sep.	okt.	nóv.	des.
Kolmunni												
Loðna												
Makríll												
Síld												

*Eskja á 1% af aflahlutdeild ýsu og 1,6% af hlutdeild í þorski sem nýtt er til skipta við uppsjávartegundir

3. Um Eskju

Uppsjávarvinnsla

Eskja starfrækir hátækni uppsjávarfrystihús á Eskifirði sem býr yfir vinnslugetu upp á 900 tonn á sólarhring. Uppsjávarfrystihúsið var byggt árið 2016 og er 7.000m² að stærð. Árið 2020 byggði Eskja frystiklefa sem rúmar allt að 9.000 tonn til þess að styðja enn frekar við vinnsluna. Í vinnslunni er unnið til manneldis, loðna, makrill og síld sem er ýmist heilfryst, flökuð eða hausskorin. Árið 2021 voru unnin 35.460 tonn af uppsjávarafurðum í vinnslunni. Vinnsla í uppsjávarfrystihúsi stóð yfir í fimm mánuði á árinu. Vinnsla hófst með loðnuvertíð í febrúar fram í mars, frá júlí og til loka nóvember en félagið leigði til sín heimildir í íslenskri síld sem unnin var í lok nóvember.

Eskja selur afurðir á alþjóðamörkuðum og er í alþjóðlegri samkeppni. Úkraína, Georgía, Tyrkland, Pólland, Bandaríkin og Japan eru helstu markaðir fyrir afurðir félagsins.

Aflamarskerfi í fiskveiðum, frjáls verðmyndun á innlendum fiskmörkuðum og öflugt samstarf íslenskra sjávarútvegsfyrirtækja hefur eflt samkeppnisstöðu íslenskra sjávarútvegsfyrirtækja. Íslenskur sjávarútvegur og sérstaklega Eskja stendur þar vel að vígi.

Helstu markaðir



Úkraína



Georgía



Tyrkland



Pólland




Bandaríkin




Japan

Móttekið hráefni (þús. tonn)



Verðmæti (milljarðar króna)



3. Um Eskju

Mjöl- og lýsisvinnsla

Mjöl- og lýsisvinnsla Eskju er staðsett við Strandgötu 2 á Eskifirði. Núverandi vinnsla hefur gengið í gegnum mikla endurnýjun á undanförunum árum. Nýr skorsteinn var reistur, hreinsivirki fyrir útblástur var smíðað, verksmiðjuhúsið endurbyggt og nýtt starfsmannahús reist. Á árinu 2021 voru keyptar nýjar pressur og áfram verður unnið að endurbótum að vélbúnaði og fjárfest í nýjum sjóðurum sem verða teknir í notkun á seinni helmingi ársins 2022.

Verksmiðjan er að fullu rafvædd og er jarðefnaeldsneyti einungis notað sem varaafli. Vegna raforkuskorts á landinu í lok árs 2021 fékk verksmiðjan ekki afhent raforku og þurfti að beita varaafli að fullu í fyrsta sinn síðan verðsmiðjan var rafvædd árið 2012. Afköst eru 1.000 tonn af hráefni á sólarhring og hægt er að geyma allt að 20.000 tonn af mjöl- og lýsisafurðum í geymslum verksmiðjunnar í einu. Verksmiðjan er búin öllum besta tækja- og tæknibúnaði sem fáanlegur er til framleiðslu mjöl- og lýsisafurða og getur hún með loftþurrkun við lágan hita framleitt hágæðamjöl sem m.a. er notað til framleiðslu fiskeldisfóðurs.


Gæða- og umhverfiskröfur til vinnslunnar eru miklar og rekur verksmiðjan eigin rannsóknarstofu auk þess að styðjast við HACCP gæðakerfi sem tryggir að afurðir mjöl- og lýsisvinnslunnar séu ávallt af þeim gæðum sem viðskiptavinir hennar óska. Vinnslan fékk í ársbyrjun 2004 FEMAS vottun á framleiðslu sína fyrst verksmiðja á Íslandi.

Reynt er að halda allri loftmengun í lágmarki en óhjákvæmilega kemur í einstaka tilvikum lykt frá slíkri vinnslu sem mjöl- og lýsisvinnslan er. Ef upp kemur sú staða að rafmagn frá veitu skerðist, brennir vinnslan gasolíu sem gefur frá sér mengandi lofttegundirnar CO₂ og SO₂.


Rekstrarstjóri mjöl- og lýsisvinnslunnar heldur utan um grænt bókhald verksmiðjunnar.



Verðmæti (milljarðar króna)



Móttækið hráefni (þús. tonn)



3. Um Eskju

Vinnsla á loðnuhrognum

Eftir loðnubrest á árunum 2019-2020 hófst vinnsla á hrognum að nýju árið 2021 og skapaði hrognavinnsla 1.542 m.kr. verðmæti á því ári.

Eskja fjárfesti á árinu í nýrri hrognavinnslu og endurbætti allan búnað og verkferla við vinnslu loðnuhroga. Félagið byggði sérstakt hrognavinnsluhús að Marbakka 7 á Eskifirði til þar sem loðna er skorin með mun meiri afköstum og betri nýtingu en áður. Í heild fjárfesti félagið fyrir 759 milljónir í húsnæði og búnaði til að vera enn betur í stakk búið að vinna meiri verðmæti úr loðnu en útlit er að stofninn verði sterkur árin 2022 og 2023.

Hrognin eru fyrst og fremst seld til Japan og annarra markaða í Asíu.

Helstu markaðir



Taíland



Kína




Suður Kórea




Japan



Verðmæti (milljarðar króna)



Móttekið hráefni (tonn)



4. Eskja og sjálfbærni

Heimsmarkmið SP, UFS viðmið og GRI staðlar

Fyrirtæki innan vébanda Samtaka fyrirtækja í sjávarútvegi (SFS) hafa markað sér stefnu í samfélagsábyrgð sem grundvallast á Heimsmarkmiðum Sameinuðu þjóðanna um sjálfbæra þróun. Heimsmarkmið Sameinuðu þjóðanna um sjálfbæra þróun voru samþykkt af fulltrúum allra aðildarríkja Sameinuðu þjóðanna í september árið 2015. Markmiðin, sem gilda á tímabilinu 2016-2030, eru 17 talsins með 169 undirmarkmið: Grunnildin í samfélagsstefnu sjávarútvegs eru Heimsmarkmið Sameinuðu þjóðanna númer 14 sem er *líf í vatni* og númer 9 sem er *nýsköpun og uppbygging* en önnur markmið eru ekki síður mikilvæg.



Eskja er vakandi fyrir nýjum tækifærum til þess að auka árangur félagsins í umhverfismálum. Undanfarin ár hefur Eskja fjárfest í lausnum sem stuðla að betri nýtingu auðlinda og sjálfbærni. Áður voru afurðir félagsins að mestu geymdar erlendis en í dag er notast við endurnýjanlega orkugjafa við frystingu og geymslu á afurðum. Allt rafmagn sem Eskja kaupir kemur frá endurnýjanlegum orkugjöfum, annaðhvort vatnsafli eða jarðvarma.



Markmið Eskju er að efla rannsóknir á vistfræði og efnafræði sjávar og efla skilning á áhrifum hlýnunar og súrnunar sjávar og plastmengunar á lífríki hafsins. Eskja býður fram Aðalstein Jónsson í rannsóknarleiðangra á loðnu ár hvert. Eskja er aðili að félagi uppsjávariðnaðarins sem vinnur sameiginlega að rannsóknar- og þróunarverkefnum í uppsjávariðnaði. Félagið er að vinna að þremur verkefnum sem eru: vinnsla byggð á stykkjum, örverur og vinnsla, vannýttir og ónýttir stofnar. Einnig vil Eskja gera enn betur í að efla skilning fólks á áhrifum loftlagsbreytinga á lífríki hafsins.

HEIMSMARKMIÐ Sameinuðu þjóðanna um sjálfbæra þróun



Árs- og sjálfbærnisýrsla Eskju fyrir árið 2021 er sett upp í samræmi við viðmið um umhverfi, félagslega þætti og stjórnarhætti (UFS) og horfir til helstu áhrifabátta félagsins þessu tengt. Félagið setur einnig fram skýrslugjöf sína út frá GRI stöðlum og er þá að finna í viðauka.



4. Eskja og sjálfbærni



Víðtækt samstarf og áhersla á að uppfylla gæðakröfur er lykilatriði í sjálfbærni

Eskja hefur alla tíð lagt ríka áherslu á að umgangast hafið og lífríki þess af virðingu og ábyrgð í samræmi við lög og reglur. Eskja er hluti af Iceland Responsible Fisheries (IRF) sem aflar vottanna á veiðarfæri og fiskistofna sem nýttir eru í hafinu við Ísland. Markmiðið er að sýna kaupendum og neytendum fram á að við Íslandsstrendur séu ástundaðar sjálfbærar fiskveiðar og að mikil vinna er lögð í að tryggja verndun fiskistofnanna sem eru uppspretta hagsældar í landinu.

Félagið vinnur ötullega að því að allir þættir í starfsemi sinni fari fram í góðri sátt við umhverfið. Ávallt er stefnt að því að hráefni og orkugjafar séu nýttir til fullnustu. Leitast er við að nota umhverfisvænar umbúðir, efni og rekstrarvörur sé því viðkomandi. Einnig er reynt er að halda losun og úrgangi sem verður til í starfseminni í lágmarki. Starfsfólk Eskju er meðvitað um umhverfisstefnu fyrirtækisins og hagar störfum sínum í samræmi við hana.

Eskja er hluti af Festu, miðstöð um sjálfbærni og hefur tekið virkan þátt í að þróa málaflokk um sjálfbærni innan Samtaka fyrirtækja í sjávarútvegi. Félagið ætlar sér á næstu árum að halda áfram byggja á þeim trausta grunni tengdum sjálfbærni sem það hefur skapað sér. Slík fjárfesting er nauðsynleg til að tryggja að starfsemi Eskju uppfylli allar helstu gæðakröfur og taki mið af viðeigandi áhættum sem og tækifærum sem tengjast sjálfbærni og loftslagsbreytingum.

Aðild að samtökum*



Iceland
Responsible
Fisheries



Miðstöð um
sjálfbærni



Samtök
atvinnulífsins



Samtök fyrirtækja
í sjávarútvegi



Félag íslenskra
fiskimjöls-
framleiðenda

Vottanir og gæðastjórnunarkerfi



IFFO Global Standard for
Responsible Supply



Marine Stewardship
Council



Hazard Analysis
and Critical
Control Points



Feed Material
Assurance
Scheme



TÚN, vottun um
lífræna
framleiðslu

*Eskja er líka aðili að Félagi uppsjávariðnaðarins

4. Umhverfisþættir

Helstu umhverfisáhrif starfseminnar hafa verið kortlögð

Umhverfismál er stórt verkefni og mikil áskorun í sjávarútvegi. Eskja mun hvarvetna leita leiða til að minnka mengun frá starfseminni og halda áfram að þróa rekstur sinn til sjálfbærra veiða og vinnslu.


Á síðustu áratugum hefur orðið mikil vakning á mikilvægi sambandsins milli samfélags og fyrirtækja. Það kemur sífellt betur í ljós að starfsemi fyrirtækja fer ekki fram í einangrun frá samfélaginu, heldur eru fyrirtæki háð samfélaginu og umhverfinu sem þau starfa í. Auk þess hafa skaðleg áhrif af starfsemi fyrirtækja á umhverfið orðið skýrari en áður.

Sjávarútvegur er grunnatvinnuvegur um allt land. Á undanförunum árum hafa orðið miklar framfarir í veiðum og vinnslu. Störfum hefur fækkað með nýrri tækni en að sama skapi hefur aukin tækni leitt til þess að aðstæður starfsfólks við veiðar og vinnslu eru mun betri og störfin þess vegna fjölbreyttari. Framþróun í fiskileit og þróun veiðarfæra sem og meðhöndlun afla um borð hefur orðið til þess að ástand fiskistofna er betra.

Eskja leggur áherslu á sjálfbæra meðferð auðlindarinnar og er stefna Eskju að allir þættir í starfsemi fyrirtækisins séu í fullri sátt við umhverfið. Með sjálfbærri þróun er leitast við að ná jafnvægi milli samfélagslegra, efnahagslegra og umhverfislegra þátta og samþætta þá við ákvarðanatöku. Betri umgengni við auðlindir og náttúru er sameiginlegt markmið okkar allra.

Eskja hefur kortlagt helstu umhverfishætti sem félagið hefur áhrif á með starfsemi sinni með að það markmiði að draga úr neikvæðum áhrifum sem mest má.

Kolefnisspor metið út frá umfangi 1, 2 og 3



Helstu umhverfisþættir tengdir rekstri Eskju eru:

- 1) Losun gróðurhúsalofttegunda (kolefnisspor)
- 2) Endurvinnsla úrgangs (hringsrásarhagkerfi)

Áhætta vegna loftslagsbreytinga eykst sífellt og mun Eskja leita leiða til meta áhrifin á rekstur félagsins, bæði út frá umbreytingaráhættu (e. transition risk) sem og raunlægri áhættu (e. physical risk).

4. Umhverfispættir

Kolefnisspor

Eskja fjárfestir í lausnum sem stuðla að betri nýtingu auðlinda og sjálfbærni. Vinnslan hefur verið færð í land þar sem vinnslan notar rafmagn og að sama skapi gengur frystiklefinn á Eskfirði fyrir rafmagn. Allt rafmagn sem Eskja kaupir kemur frá endurnýjanlegum orkugjöfum, annaðhvort vatnsafli eða jarðvarma.

Fiskiskipin nota eldsneyti en við endurnýjun á skipaflota er lögð áhersla á sparneytnari skip þar sem hægt er að lágmarka olíunotkun. Olíunotkun hefur minnkað undanfarin ár, sem er afleiðing af sterku fiskveiðistjórnunarkerfi sem hefur byggt upp sterka fiskistofna.

Eskja hefur hætt notkun á svartolíu og á sama tíma aukið hlut vistvænni orkugjafa.


Við mælingu á kolefnisspori Eskju er notuð kolefnisreiknivél SFS sem byggir á viðurkenndri aðferðafræði The Greenhouse Gas Protocol.

Kolefnisspor er brotið niður út frá beinni og óbeinni losun:

- **Umfang 1:** Bein losun sem samanstendur af olíunotkun skipaflota, bifreiða, vinnuvéla og fiskimjölsværsmiðju og áfyllingar kælimiðla á skipaflota.
- **Umfang 2:** Samanstendur af óbeinni losun frá raforku- og heitavatnsnotkun.
- **Umfang 3:** Tákna óbeina losun frá virðisbætti félagsins (upstream og downstream). Í mælingum sínum tekur Eskja inn eftirfarandi þætti til óbeinnar losunar undir umfangi 3: úrgangur, flutningur og ferðalög og umbúðir og veiðarfæri

Eskja stefnir á að mæla áfram kolefnisspor með það að markmiði að draga úr losun tengdri rekstri sínum og setja sér markmið og aðgerðaráætlun.

Kolefnisuppgjör (tCO₂i)



Samantölur á milli ára

Í ljósi aukinna umsvifa félagsins á árinu 2021, þá jókst kolefnislosun Eskju um 7.148,6 tCO₂i. Þar munar helst um:

- Aukin eldsneytisnotkun við veiðar og þá sér í lagi vegna loðnuveiða sem ekki fóru fram árið 2020. Einnig jókst olíunotkun vegna veiða á makríl og síld á meðan minna var um kolmunaveiðar en á árinu á undan
- Framleiðsla í verksmiðjum vegna uppsjávarvinnslu jókst um 25% mælt í tonnum sem skýrir að stærstum hluta aukningu á kolefnislosun undir framleiðslu.
- Vegna orkuskiots, gat Landsvirkjun ekki afhent nægjanlega orku á haustmánuðum 2021 fyrir starfsemina og því nauðsynlegt að nota olíu í stað endurnýjanlegrar orku. Hafði það umtalsverð áhrif til hækkunar á kolefnisspori félagsins
- Ef miðað er við olíunotkun skipa miðað við veitt tonn (lítr./VT), þá lækkar það hlutfall úr 105 í 92 á milli ára.

4. Umhverfispættir

Endurvinnsla og sorp

Endurvinnsla og sorp

Eitt af markmiðum Eskju er að endurnýta eða endurvinna eins mikinn úrgang og hægt er. Leitast er við að hafa urðun í lágmarki.

Í landvinnslu er sorp flokkað og endurnýtt eins og kostur er. Hlutfall flokkaðs rekstrarúrgangs árið 2021 var 82%. Sorp er flokkað í pappa og plast og annan úrgang sem fellur til, líkt og timbur, málma og grófan úrgang.


Á sjó er sorpi skipt upp í almennt sorp, veiðarfæri, spilliefni og lífrænan úrgang. Lífræni úrgangurinn fer í sjóinn. Við leggjum okkar af mörkum við hreinsun hafsins með því að taka með til hafnar allt rusl úr sjó sem í veiðarfæri kemur.

Innkaup og birgjar

Eskja leggur áherslu á að kaupa vörur og þjónustu af birgjum í nærsamfélaginu eins og kostur er. Nærsamfélagið er skilgreint sem sveitarfélagið sem Eskja er með starfsemi í.

Eskja hefur ekki sett ákvæði um sjálfbærni í samninga við birgja. Hins vegar er markmið Eskju er að eiga reglulegt samtal við birgja þar sem farið er yfir viðeigandi ferla til að tryggja að birgjarnir framfylgi lögum og reglum hvort sem kemur að umhverfismálum, félagslegum þáttum eða stjórnarháttum.

Rekstrarúrgangur í reglulegri starfsemi í landvinnslu (kg)



4. Umhverfispættir

Kolefnisspor matvæla

Samanburður matvæla út frá kolefnisspori

Samkvæmt Matvæla- og landbúnaðarstofnun Sameinuðu þjóðanna (FAO) má rekja 30% af losun gróðurhúsalofttegunda (GHL) til matvælaframleiðslu í heiminum.


Í þessu ljósi er áhugavert er að bera saman losun gróðurhúsalofttegunda í sjávarútvegi við kjötafurðir frá evrópskum mörkuðum s.s. út frá nautgriparækt, svínakjöti og kjúklingi.

Í nýlegri norskri rannsókn þessu tengt, kemur skýrt fram að sjávarafurðir mælast með töluvert lægra kolefnisspor en kjötafurðir líkt og kemur fram á skýringarmynd hér til hliðar.

Einnig er vert að nefna sérstöðu uppsjávarfisks, en bæði síld og makrill mælast með minnsta fótsporið, eða um 3-4% af kolefnisspori nautakjöts framleiddu í Evrópusambandinu.

Ljóst er að neytendur eru farnir að horfa í ríkari mæli til sjálfbærniþátta við innkaup sín og þar vegur kolefnissporið þungt. Þessu fylgja því óneitanlega tækifæri fyrir frekari markaðssetningu og sölu á uppsjávartegundum líkt og síld og makríl en þetta er eitthvað Eskja stefnir á að nýta sér í auknum mæli.

Kolefnisspor mismunandi afurða



4. Umhverfispættir

Skógræktarverkefni í heimahéraði



Frá vinstri: Gunnlaugur Guðjónsson, Pall Snorrason, Þróstur Eysteinnsson, Erna Þorsteinsdóttir, Sigrún Ísaksdóttir

Ábyrg kolefnisjöfnun

Eskja hefur samið við Skógræktina um að þróa kolefnisverkefni í landi jarðarinnar Freyshóla á Fljótshéraði. Þar hyggst fyrirtækið binda kolefni með nýskógrækt á um 36 hektara svæði. Stefnt er að hefja gróðursetningu á landinu á árinu 2022 og ljúka henni árið 2023 en með verkefninu verða til vottaðar kolefniseiningar sem tryggja ábyrga kolefnisbindingu á móti samsvarandi losun vegna starfsemi Eskju.

Verkefnið er umfangsmikið og er félagið að stíga sín fyrstu skref í skógrækt en plönturnar munu á næstu áratugum binda sem jafngildir eins árs losun hjá fyrirtæki eins og Eskju. Um verður að ræða um 80.000 plöntur (fura 50.000, greni 28.000 og ösp 2.000). Með þessu verður Eskja fyrsta sjávarútvegsfyrirtækið sem ræðst í ábyrga kolefnisjöfnun samkvæmt álit Loftslagsráðs.

Í ábyrgri kolefnisjöfnun felst að dregið sé úr losun gróðurhúsalofttegunda eins og mögulegt er á hverjum tíma. Með bindingarverkefnum er einungis unnið á þeirri losun sem ekki er hægt að stöðva að svo stöddu. Til að ferlið standist álit Loftslagsráðs um ábyrga kolefnisjöfnun er mikilvægt að farið sé eftir vönduðu regluverki eða gæðakerfi, árangur verkefnisins sé metinn af sérfræðingum og allt ferlið að lokum vottað af óháðu vottunarfyrirtæki.

Skógarkolefni er þess háttar regluverk eða gæðakerfi sem byggir á alþjóðlegum viðmiðum. Verkefni sem unnin eru samkvæmt því eru skráð í Loftslagsskrá Íslands og eftir tiltekinn tíma verða til vottaðar kolefniseiningar sem telja má fram á móti losun eða versla með líkt og verðbréf þar til ákveðið er að nota þær á móti losun.

Með þessu markar Eskja sér metnaðarfulla og trúverðuga stefnu út frá ábyrgri kolefnisjöfnun sem mun styðja við vegferð félagsins í átt að framtíðar kolefnishlutleysi.

5. Félagslegir þættir

Mannauður

Eskja er hátækisjavarútvegsfyrirtæki í fremstu röð. Fyrir slíkt félag er sífellt mikilvægara að ráða hæft og gott fólk til starfa. Starfsmannastefna Eskju er skammstöfuð H.A.F. sem stendur fyrir orðin **heilindi, atorka og færni**. Þessir þrír þættir eru hverjum manni mikilvægir og stuðla að auknum þroska og uppbyggingu einstaklings. Saman standa þessi orð fyrir hugmyndafræði starfsmannastefnu félagsins og leggja um leið grunninn að fyrirtækismenningu félagsins.

Hjá Eskju er stjórnendum og starfsfólki annt um velferð samstarfsfólks síns og leitast Eskja í hvívetna eftir að stuðla að almennri starfsánægju og góðum starfsanda. Þar sem fjölskylda og nánustu aðstandendur eru ein mikilvægasta undirstaða farsæls starfsferils og árangurs í starfi kappkostar Eskja að gera starfsfólki sínu mögulegt að samræma starf og fjölskylduábyrgð.

Það er við hæfi að upphafsstafir þessara þriggja orða starfsmannastefnu Eskju myndi orðið HAF. Hafið er uppspretta ómældra tækifæra og um leið lífæð okkar fyrirtækis. Auðlindir hafsins eru vandmeðfarnar og þurfa að vera í góðu jafnvægi svo að þær megi gefa af sér til framtíðar. Sömuleiðis þurfum við sjálf að halda gullnu jafnvægi á milli eigin auðlinda; starfsþróttar, heilsu og andlegrar vellíðanar.



H

Heilindi starfsfólks eru einn af hornsteinum hvers fyrirtækis þar sem samkennd og mannleg virðing eru í öndvegi.

A

Atorkan er sá frumkraftur er ríkja þarf hjá starfsfólki sem umbreytist í vilja til góðra verka og nýrrar hugsunar. Hún er einnig viljinn til þess að halda áfram þegar á móti blæs og er getan til þess að snúa erfiðum aðstæðum í tækifæri.

F

Færni byggist á því að nýta eiginleika og styrk okkar sem best, takast á við síbreytilegt umhverfi og auka þekkingu okkar og getu í krefjandi samfélagi. Það er því mikilvægt fyrir starfsfólk Eskju að eiga möguleika á að auka færni sína til þess vaxa og dafna í starfi sínu.

5. Félagslegir þættir

Mannréttindi

KJARASAMNINGAR OG MANNRÉTTINDI

Gott starfsfólk er forsenda velgengni fyrirtækja í sjávarútvegi. Okkur er ljós sú ábyrgð sem við berum gagnvart starfsfólki okkar og höfum virðingu að leiðarljósi í öllum okkar samskiptum. Við viljum að vinnustaðir séu öruggir og góðir, og búi yfir hæfu og traustu starfsfólki sem vinnur í samræmi við markmið okkar í umhverfismálum og samfélagsábyrgð.

Það er stefna Eskju að fara eftir gildandi lögum og reglum um mannréttindi sem lúta meðal annars nauðungar- og þrælkunarvinnu, barnavinnu og misrétti á vinnustöðum. Eskja mun aldrei líða vinnumannsál eða barnavinnu né misbeitingu gagnvart starfsfólki (ólöglegt vinnuafli), hvorki hjá Eskju né þeim sem fyrir Eskju starfar.

Einelti eða ofbeldi af nokkru tagi er ekki liðið innan félagsins og hefur Eskja útbúið verkferla til að taka á slíkum málum ef upp koma. Allt starfsfólk fyrirtækisins leggur sitt af mörkum til að fyrirbyggja neikvæða hegðun og stuðla að góðum samskiptum, starfsánægju og öruggu umhverfi.

Eskja virðir rétt starfsfólks til félagaafrelsis og kjarasamninga og fer í launa-, kjara- og réttindamál að ákvæðum kjarasamninga viðkomandi stéttarfélaga. Þar sem kjarasamningar kveða ekki á um launakjör starfsfólks taka laun mið af inntaki starfa, álagi, hæfni og árangri starfsfólks. Eskja tryggir að launagreiðslur og réttindamál starfsfólks séu ávallt í samræmi við gildandi kjarasamninga

ÖRYGGI OG HEILSA

Eskja leggur mikið upp úr vinnuvernd og öryggismálum. Starfsfólki er skylt að fylgja lögum um öryggi og aðbúnað á vinnustað, ásamt því að fylgja því verklagi og reglum sem Eskja hefur sett. Það er jafnt á ábyrgð stjórnenda sem starfsfólks að farið sé að þeim kröfum sem gerðar eru um öryggi og aðgát í starfi.

Eskja hefur gefið út öryggishandbók og sett fram öryggis- og heilbrigðisáætlun og er með því leitast við að tryggja að vinnuverndarstarf fyrirtækisins verði skipulagt og markvisst.

Eskja stuðlar að bættri öryggisvitund með fræðslu til starfsfólks. Lögð er áhersla á að allt starfsfólk Eskju sýni ábyrgð í verki og hafi stöðugt í huga áhættu- og álagspætti sem fylgja störfum þeirra.

Árið 2021 voru tilkynnt um sex vinnuslys í landvinnslu, einu fleira en árið áður. Tilkynnt vinnuslys á skipum félagsins var eitt árið 2021 sem er einu færri en árið áður. Markmiðið er alltaf að starfsemi félagsins sé slysalaus.

5. Félagslegir þættir

Mannauður og samfélag



FRÆÐSLA & UPPBYGGING MANNAUÐS

Þekking og hæfni starfsfólks er grundvöllur árangursríks atvinnulífs. Mikilvægt er að hlúa vel að mannauðnum og þróun hans þar sem hann er talinn vera verðmætasta auðlind fyrirtækja. Mannauður og atvinnulíf haldast þétt í hendur og nær þróun mannauðs yfir breytt svið og má þar nefna þjálfun, fræðslu, þróun, símenntun, endurmenntun, starfsferla o.fl.

Eskja heldur reglulega námskeið sem nýtast starfsfólki í starfi. Starfsfólk er hvatt til þess að miðla þekkingu sinni áfram til annars starfsfólks.

Eskja heldur námskeið einu sinni á ári fyrir vinnslur félagsins. Námskeiðið er haldið sérstaklega fyrir nýtt starfsfólk í vinnslu en fastráðið starfsfólk mætir einnig á námskeiðið til endurmenntunar. Sjómenn fara reglulega á öryggisnámskeið.

SAMFÉLAGSVERKEFNI

Eskja leggur sitt af mörkum til nærsamfélagsins en árið 2021 veitti Eskja samfélagsstyrki að fjárhæð um 26 milljónir króna. Eskja styrkir góð samfélagsleg málefni í heimabyggð og er dyggur stuðningsaðili æskulýðsstarfs. Sem dæmi þá er Eskja með samstarfs- og styrktar-samning við Ungmennafélagið Austra og dyggur styrktaraðili Knattspyrnufélags Fjarðabyggðar.

PERSÓNUVERND

Eskju er umhugað um persónuvernd og öryggi þeirra gagna sem félagið er með undir höndunum hverju sinni. Eskja safnar upplýsingum um starfsfólk, viðskiptavini og birgja sem félaginu er skylt að varðveita í samræmi við lög og reglur, kjarasamninga, ráðningarsamninga, samþykki einstaklings eða vegna annarra lögmætra hagsmuna Eskju.



5. Félagslegir þættir

Jafnréttismál

Jafnréttisáætlun og jafnlaunavottun


Jafnréttisáætlun Eskju á að tryggja fullt jafnrétti milli kvenna og karla á vinnustaðnum með það að markmiði að nýta hæfni, krafta og kunnáttu starfsfólks til fulls án þess að kynbundin mismunun eigi sér stað. Hver einstaklingur er metinn að eigin verðleikum. Tryggja skal að starfsmönnum sé ekki mismunað á nokkurn hátt svo sem vegna kyns, trúarbragða, skoðana, þjóðernisuppruna, kynhneigðar, litarháttar, kynþáttar, efnahags, ætternis, fötlunar, aldurs og stöðu að öðru leyti. Jafnréttisáætlun Eskju miðar einnig að því að auka almenna starfsánægju og bæta starfsanda. Þá eru í stefnunni markmið og aðgerðir sem lúta að ákvæðum jafnréttis laga.

Í samræmi við lög nr. 10/2008 hefur Eskja lokið jafnlaunavottun, sem staðfestir að jafnlaunakerfi fyrirtækisins og framkvæmd þess uppfylli kröfur staðals ÍST 85.



JAFNLAUNAVOTTUN
2021 - 2024

Kynjaskipting eftir starfstitlum*



*Stjórn og fastráðið starfsfólk. Á vertíð bætast við 30-40 tímabundið. Meðalstöðugildi ársins eru um 100

6. Stjórnarhættir

Stjórn og stjórnarhættir

STJÓRN OG STJÓRNARHÆTTIR

Rekstur Eskju er háður ítarlegu regluverki og er undir opinberu eftirliti stofnana hvað varðar rekstur skipaflota, vinnslu- og gæðamál. Eskja leggur áherslu á að fylgja skýrum verkferlum til að tryggja að reksturinn uppfylli þær kröfur sem gerðar eru í lögum og reglum.

Stjórnarhættir félagsins taka mið af lögum nr. 2/1995 um hlutafélög, samþykktum félagsins og starfsreglum stjórnar. Eskja mun aðlagða stjórnarhætti sína að leiðbeiningum um stjórnarhætti fyrirtækja sem eru gefnar út af Viðskiptaráði Íslands, Nasdaq Iceland hf. og Samtökum atvinnulífsins og taka gildi 1. júlí 2021.

Stjórnin mótar stefnu, setur markmið og skilgreinir lykiláhættu í rekstri Eskju og með hvaða hætti brugðist verði við þeirri áhættu sem um ræðir. Stjórnendur hafa virkt eftirlit með áhættuþáttum sem hafa áhrif á rekstur og afkomu félagsins. Áhættustýring og innra eftirlit er samofið allri starfsemi félagsins með þann tilgang að gera auðveldara fyrir stjórnendur að hafa umsjón með rekstrinum. Stjórnin sér til þess að til staðar sé virkt kerfi innra eftirlits sem er formlegt, skjalfest og virkni þess reglulega yfirfarin.

Ársreikningur fyrirtækisins er gerður í samræmi við lög um ársreikninga og settar reikningsskilareglur. Ársreikningurinn byggir á kostnaðarverðsreikningsskilum. Ársreikningurinn er settur fram í bandaríkjadal (USD) sem er starfrækslugjaldmiðill félagsins.

Eskja telst nú sem eining tengd almannahagsmunum, sbr. e. lið 1. mgr. 2. gr. laga nr. 3/2006 um ársreikninga. Á árinu 2021 var kosin endurskoðunarnefnd hjá félaginu. Stjórn ber ábyrgð á skipun endurskoðunarnefndar og skal það gert eigi síðar en mánuði eftir aðalfund. Sú nefnd skal m.a. hafa eftirlit með vinnuferli við gerð reikningsskila, eftirlit með virkni og skipulagi innra eftirlits og áhættustýringar og hafa eftirlit með endurskoðun ársreiknings og samstæðureiknings félagsins. Endurskoðunarnefndin gefur stjórn álit sitt á reikningsskilunum áður en þau eru lögð fram til samþykktar stjórnar. Jafnframt gerir endurskoðunarnefnd tillögu til stjórnar um val á ytri endurskoðanda eða endurskoðunarfyrirtæki og skal nefndin meta óhæði sem og hafa eftirlit með öðrum störfum ytri endurskoðanda.

HELSTU ÁHÆTTUÞÆTTIR

Helstu áhættuþættir í rekstri Eskju eru tengdir tekjustreymi, fjármögnum og gengis- og vaxtaáhættu. Stjórnendur hafa heimild til að gera framvirka samninga til að takmarka gengis- og vaxtaáhættu. Einnig hefur áhætta tengd orkunotkun skipaflotans aukist í kjölfar hækkandi olíuverðs.

Með hliðsjón af því að mikilvægar tegundir eru deilistofnar, nýttar af fleiri en íslenskum útgerðum bera þeir áhættu tengda nýtingu og ofveiði umfram stofna sem einungis eru nýttir innan íslenska fiskveiðistjórnunarkerfisins.

6. Stjórnarhættir

Stjórn og stjórnarhættir

HLUTVERK OG ÁBYRGÐ STJÓRNAR

Stjórn fer með æðsta vald í málefnum Eskju á milli hluthafafunda og ber meginábyrgð á rekstrinum. Stjórn leggur áherslu á góða stjórnarhætti og að starf stjórnar og félagsins sé ávallt samkvæmt lögum, reglum og góðum viðskiptaháttum. Stjórnin er skipuð þremur aðalmönnum og tveimur varamönnum. Að loknum aðalfundi sem kýs stjórnina skal hún strax koma saman til fundar og kjósa sér formann. Formaður stjórnar kemur fram fyrir hönd félagsins út á við nema hann ákveði annað.

Stjórnin kemur reglulega saman samkvæmt ákvörðun stjórnarformanns. Formanni er skylt að boða fundi ef einhver stjórnarmanna eða framkvæmdastjóri krefst þess. Alls voru haldnir 8 stjórnarfundir árið 2021 og var full mæting á alla fundi.

Stjórn ber ábyrgð á að nægilegt eftirlit sé haft með bókhaldi og meðferð fjármuna félagsins og fylgjast með áætlunum, þ.m.t. fjárhagsáætlunum og taka afstöðu til skýrslna um greiðslugetu félagsins.


Stjórn fer árlega yfir framkvæmd hlutverks síns, verklag og starfshætti ásamt frammistöðu stjórnarformanns og framkvæmdastjóra með það að markmiði að bæta skilvirkni og eftirlit stjórnar. Stjórnin sér um að gæta hagsmuna allra hluthafa og að gæta jafnræðis milli þeirra. Stjórn er leiðandi við stefnumörkun félagsins til framtíðar.

Daglegur rekstur er í höndum stjórnenda Eskju í samræmi við stefnu og ákvarðanir stjórnar. Farið er yfir uppgjör og áætlanagerð reglulega sem hluta af innra eftirliti með rekstri félagsins.

Framkvæmdastjóri ber ábyrgð á daglegum rekstri félagsins og fer með ákvörðunarvald í málefnum sem ekki eru falin öðrum eða falla undir verksvið stjórnar eðli málsins samkvæmt.


6. Stjórnarhættir

Eignarhald*



6. Stjórnarhættir

Skipurit



6. Stjórnarhættir

Stjórn



Erna Þorsteinsdóttir

Stjórnarformaður

Erna hefur gegnt stöðu stjórnarformanns frá 2009. Hún útskrifaðist sem viðskiptafræðingur með áherslu á markaðssamskipti við Háskólann á Bifröst. Hún var annar eigenda útflutningfyrirtækisins Fiskimiða ehf. sem varð dótturfyrirtæki Eskju 2009 og nefnist nú Eskja Sales & Export þar sem Erna er framkvæmdastjóri. Erna telst háð félaginu og daglegum stjórnendum þess og telst háð stórum hluthafa félagsins samkvæmt leiðbeiningum um stjórnarhætti.



Þorsteinn Kristjánsson

Forstjóri og meðstjórnandi

Þorsteinn hefur starfað hjá fyrirtækinu í næstum fjóra áratugi. Þorsteinn tók við stöðu forstjóra 2009 en þar áður gegndi hann stöðu stjórnarformanns og var jafnframt skipstjóri hjá félaginu. Þorsteinn brautskráðist með skipstjórnarpróf frá Stýrimannaskólanum í Reykjavík 1976 og hefur mikla starfsreynslu í sjávarútvegi. Þorsteinn telst háður félaginu og daglegum stjórnendum þess, auk þess að teljast háður stórum hluthafa félagsins samkvæmt leiðbeiningum um stjórnarhætti.



Einar Þór Sverrisson

Meðstjórnandi

Einar Þór útskrifaðist sem lögræðingur frá Háskóla Íslands 1999. Hann varð héraðsdómslögmaður 2002 og fékk réttindi til málflutnings fyrir Hæstarétti 2008. Einar Þór hefur verið viðriðinn íslenskt atvinnulíf frá tvítugsaldri og hefur setið í stjórn nokkurra stærstu fyrirtækja landsins. Engin hagsmunatengsl eru við helstu viðskiptavini félagsins, samkeppnisaðila eða stóra hluthafa.



Daði Þorsteinsson

Varamaður

Daði hefur starfað hjá félaginu síðan 1988. Hann brautskráðist með skipstjórnarpróf frá Stýrimannaskólanum í Reykjavík 1998 og hefur verið starfandi sem skipstjóri á Aðalsteini Jónssyni frá 2006. Daði telst háður félaginu og daglegum stjórnendum þess, auk þess að teljast háður stórum hluthafa félagsins samkvæmt leiðbeiningum um stjórnarhætti.



Ágúst Heimir Ólafsson

Varamaður

Ágúst Heimir er viðskiptafræðingur frá Háskóla Íslands. Hann útskrifaðist 1993 og hlaut löggildingu í endurskoðun 2000. Ágúst hefur mikla reynslu í fjármálaráðgjöf og hefur unnið fyrir mörg stærstu fyrirtæki og stofnanir landsins. Má þar m.a. nefna ráðgjöf við samruna og kaup/sölu á félögum, verðmatsþjónustu, rekstrar- og fjárhagslega endurskipulagningu, aðstoð við skráningu á hlutabréfamarkað auk annarrar þjónustu. Engin hagsmunatengsl eru við helstu viðskiptavini félagsins, samkeppnisaðila eða stóra hluthafa.

6. Stjórnarhættir

Stjórnendur



Páll Snorrason

Framkvæmdastjóri fjármála- og rekstrarsviðs

Páll hefur starfað hjá Eskju frá 2006. Hann útskrifaðist með cand.oecon gráðu frá Háskóla Íslands og lauk MBA-námi frá IESE í Barcelona. Hann starfaði á endurskoðunarsviði KPMG og sem sérfræðingur á fjármálasviði Actavis Group áður en hann kom til starfa hjá Eskju.



Benedikt Jóhannsson

Yfirmaður landvinnslu

Benedikt hefur mikla reynslu hjá Eskju, hann hefur starfað hjá félaginu frá 1979. Benedikt hefur gegnt ýmsum störfum fyrir félagið, þar á meðal sem verkstjóri, framleiðslustjóri og útgerðarstjóri.



Sigrún Ísaksdóttir

Skrifstofustjóri

Sigrún hóf störf sem skrifstofustjóri í febrúar 2018. Hún vann áður sem þjónustustjóri hjá Arion Banka. Sigrún er útskrifaður viðskiptafræðingur frá Háskólanum á Akureyri, er vottaður fjármálaráðgjafi og er með meistaragráðu í forystu og stjórnun frá Háskólanum á Bifröst.



Baldur Einarsson

Útgerðarstjóri

Baldur er menntaður sjávarútvegsfræðingur frá Háskólanum á Akureyri. Hann starfaði sem aðstoðar sölustjóri Atlantic Fresh í Grimsby og Hull. Eftir það var hann háseti á frystiskipi Eskju. Áður en Baldur tók við sem útgerðarstjóri árið 2017 starfaði hann sem sérfræðingur hjá MAST.



Haukur Jónsson

Rekstrarstjóri mjöl- og lýsisvinnslu

Haukur hóf störf hjá Eskju 1978 og hefur þar gegnt ýmsum störfum áður en hann var ráðinn rekstrarstjóri árið 1996. Haukur situr í stjórn félags íslenskra fiskimjölframleiðenda fyrir hönd Eskju.



Hlynur Ársælsson

Rekstrarstjóri uppsjávarfrystihúss

Hlynur hefur stundað sjómennsku frá unglingsárum og vann á öllum skipum Eskju á árunum 1991-2005. Hlynur starfaði hjá Samherja í áratug áður en hann snéri aftur til Eskju sem verkstjóri í uppsjávarvinnslu fyrirtækisins. Hann tók 2017 við stöðu rekstrarstjóra.



Tómas Valdimarsson

Yfirmaður viðhaldsmála

Tómas útskrifaðist sem meistari í vélvirkjun árið 1987. Tómas var svæðisstjóri hjá Hamri, á frystiskipinu Aðalsteini Jónssyni og á frystiskipi í Afríku. Tómas hóf svo störf við uppsjávarvinnslu Eskju árið 2016 og hefur gegnt stöðu yfirmanns viðhaldsmála frá ársbyrjun 2020.

Viðauki: Umhverfisuppgjör



Kolefnisuppgjör	Eining	2021	2020
Umfang 1	tCO ₂ i	23.574	17.560
Umfang 2	tCO ₂ i	357	347
Umfang 3	tCO ₂ i	9.458	8.334
<i>Kolefnisspor heild</i>	<i>tCO₂i</i>	<i>33.390</i>	<i>26.241</i>
Orkunotkun			
Raforkunotkun	kWH	36.411.453	35.428.920
Orka frá heitu vatni til húshitunar	kWH	2.401.345	2.880.445
<i>Heildarorkunotkun</i>	<i>kWH</i>	<i>38.812.798</i>	<i>38.309.365</i>
Eldsneytisnotkun			
Eldsneytisnotkun bifreiða og tækja	lítr.	25.516	12.198
Eldsneytisnotkun fiskimjölsverksmiðja	lítr.	1.068.288	-
Eldsneytisnotkun uppsjávarskipa	lítr.	8.840.337	6.315.218
Eldsneytisnotkun netabáta	lítr.	12.306	-
<i>Heildareldsneytisnotkun</i>	<i>lítr.</i>	<i>9.946.447</i>	<i>6.327.416</i>
Flokkun úrgangs			
Flokkaður úrgangur	kg	241.740	200.004
Óflokkaður úrgangur	kg	51.840	42.200
<i>Heildarmagn úrgangs</i>	<i>kg</i>	<i>293.580</i>	<i>242.204</i>
Veiði			
Veiði uppsjávarskipa	tonn	79.823	60.057
Veiði netabáts	tonn	230	-
<i>Heildarveiði</i>	<i>tonn</i>	<i>80.053</i>	<i>60.057</i>
Veiði uppsjávarafurða			
Loðna	tonn	18.603	-
Kolmunni	tonn	30.413	32.384
Makríll	tonn	13.898	15.238
Síld	tonn	16.730	12.413
Annað	tonn	179	22
<i>Samtals</i>	<i>tonn</i>	<i>79.823</i>	<i>60.057</i>

Eldsneytisnotkun eftir tegund	Eining	2021	2020
Loðna	lítr.	897.510	-
Kolmunni	lítr.	2.865.000	3.809.800
Makríll	lítr.	2.623.000	2.017.918
Síld	lítr.	972.530	487.500
<i>Samtals</i>	<i>lítr.</i>	<i>7.358.040</i>	<i>6.315.218</i>
Olíunotkun/veitt tonn (VT) eftir tegund			
Loðna	lítr./VT	48	-
Kolmunni	lítr./VT	94	118
Makríll	lítr./VT	189	132
Síld	lítr./VT	58	39
<i>Heildar olíunotkun/veitt tonn (VT)</i>	<i>lítr./VT</i>	<i>92</i>	<i>105</i>
Losun GHL eftir tegund			
Loðna	tCO ₂ i	2.495	-
Kolmunni	tCO ₂ i	7.965	10.591
Makríll	tCO ₂ i	7.292	5.610
Síld	tCO ₂ i	2.704	1.355
<i>Heildar losun GHL</i>	<i>tCO₂i</i>	<i>20.455</i>	<i>17.556</i>
Losun GHL/veitt tonn (VT) eftir tegund			
Loðna	tCO ₂ i/VT	0,13	-
Kolmunni	tCO ₂ i/VT	0,26	0,33
Makríll	tCO ₂ i/VT	0,52	0,37
Síld	tCO ₂ i/VT	0,16	0,11
<i>Heildar GHL/veitt tonn (VT)</i>	<i>tCO₂i/VT</i>	<i>0,26</i>	<i>0,29</i>
Framleiðsla í verksmiðjum			
Uppsjávarvinnsla	tonn	35.460	28.489
Hrognavinnsla	tonn	838	-
Mjöl og lýsisvinnsla	tonn	64.578	61.493
<i>Samtals</i>	<i>tonn</i>	<i>100.876</i>	<i>89.982</i>
Verðmæti afla			
Aðalsteinn Jónsson	ísk mkr.	1.855	1.117
Jón Kjartansson	ísk mkr.	1.804	1.256
<i>Samtals</i>	<i>ísk mkr.</i>	<i>3.659</i>	<i>2.373</i>

34